

Saga Film ehf.
Pósthólf 5490
125 Reykjavík

Akureyri 21. júlí 2017
UST201707-086/H.V.
09.06.01

Akstur utan vega

Umhverfisstofnun hefur móttekið umsókn Sagafilm, dags. 10. júlí 2017, um leyfi til að aka utan vega á Emstruleið, við Hafursey og Smyrlabjörg í 1-2 daga á tímabilinu 26. júlí – 3. ágúst.

Samkvæmt 1. mgr. 31. gr. laga nr. 60/2013 um náttúruvernd er óheimilt að aka vélknúnum ökutækjum utan vega. Umhverfisstofnun er heimilt, ef nauðsyn krefur, að veita leyfi til þess að aka vélknúnum ökutækjum utan vega vegna kvíkmyndagerðar, ef ekki er unnt að vinna viðkomandi störf á annan hátt, sbr. 3. ml. 2. mgr. 31. gr. laga nr. 60/2013 um náttúruvernd. Svæðið á Emstruleið sem óskað er eftir leyfi til að aka utan vega á er á náttúruminjaskrá (nr. 761).

Lýsing framkvæmdar

Við veg F261, ljósmyndatökur og drónatökur: Áætlað að bíllinn þurfi ekki að færast nema 1-2 metra eftir að hann er kominn utan vega. Gefnir voru upp þrír kostir (skýringarmynd var í gögnum umsækjanda):

A: Myndavél kyrr við gulu línum og bíllinn í auglýsingunni keyrir eftir rauðu línum. (Hér sést fjallið í mynd og bíllinn skilur eftir sig greinileg fór í sandinn.)

B: Myndavél er kyrr við veg F261 og bíllinn í auglýsingunni keyrir eftir rauðu línum. (Hér sést fjallið í mynd og bíllinn skilur eftir sig greinileg fór í sandinn).

C: Myndavélin er kyrr við gulu línum og bíllinn í auglýsingunni keyrir eftir vegi F261.

Ljósmyndir við veg F261 (sjá skýringarmynd í gögnum umsækjanda). Gefnir voru upp þrír kostir:

A: Keyra upp kletta og taka víða mynd af bíl sem sýnir allt umhverfið. Sýna spor í möl sem leiðir að klettunum.

B: Keyra upp kletta og taka víða mynd af bíl sem sýnir allt umhverfið. Sýna ekki spor í möl sem leiðir að klettunum.

C: Keyra upp kletta og taka þrengri mynd sem sýnir dekk fara yfir steina og grjót.

Hafursey: Fyrirhugað er að aka um á svörtum söndum með Hafursey í bakgrunni. Ekki verður ekið á gróðri. Myndað verður úr fjórhjóli eða jeppa yfir á bílinn í auglýsingunni sem keyrir eftir sandinum.

Smyrlabjörg og vegur F985: Fyrirhugað er að taka ljósmyndir og kvíkmyndir og nota dróna. Á svæðinu er að mestu möl en það mun þurfa að aka á 1-2 stöðum yfir gróður til að komast á tökustað. Í þau skipti sem bíll hreyfist í mynd er fyrirhugað að hann verði annað hvort á vegini, möl eða á bergi.

Að verkefninu koma 40 starfsmenn og verða eftirdraganleg klósett og aðstöðubílar á svæðinu.

Áhrifamat

Umhverfisstofnun telur að tökurnar við báða tökustaðina við veg F261 sbr. valmöguleika A og B og við Hafursey séu líklegar til að gefa rangar upplýsingar um þær reglur sem gilda um utanvegarakstur á Íslandi. Hefur Umhverfisstofnun ekki heimild til að veita undanþágu vegna aksturs utan vegar nema ekki sé unnt að vinna viðkomandi störf á annan hátt. Ekki verður séð að myndefni sem sýnir bíl keyra utanvegar vegna bílaauglýsingar samrýmist þeim heimildum sem stofnuninn hefur til að veita undanþágu til aksturs utan vegar. Skiptir þá engu máli að ekki sé hægt að tengja myndefnið við ákveðna staðsetningu. Akstur utanvegar til að komast að tökustöðum við kletta við veg F261 og Smyrlabjörg er ekki talin hafa neikvæð áhrif á svæðin sé farið eftir þeim skilyrðum sem stofnuninn setur fyrir tökunum.

Skilyrði

Umhverfisstofnun hafnar beiðni umsækjanda um akstur utan vegar meðfram vegi F261 og við Hafursey. Umhverfisstofnun veitir fyrir sitt leyfi til þess að aka utan vega til að komast að tökustað í klettum við veg F261 og tökustað við Smyrlabjörg sbr. verklýsingu í umsókn umsækjanda að uppfylltum eftirfarandi skilyrðum:

- Tilkynna skal til Umhverfisstofnunar hvenær undirbúningur fyrir tökur hefst og þegar frágangi lýkur.
- Umhverfisstofnun skal tilkynnt um öll frávik við áður útgefna verkefnalýsingu.
- Skila skal inn til Umhverfisstofnunar lokaafurð verkefnisins sem ætlunin er að birta á opinberum vettvangi. Stofnunin metur hvort að afurðin sé í samræmi við þau skilyrði sem fram koma í leyfisbréfi þessu og áskilur sér rétt til þess að krefjast þess að settur verði inn texti með áberandi hætti þar sem fram kemur að akstur utan vega sé óheimill á Íslandi.
- Þess skal gætt að í afurð verkefnisins sjáist ekki að farartæki aki utan vega eða ummerki eftir akstur utan vega.
- Þess skal gætt að valda sem minnstu raski og fjarlægja öll ummerki um akstur utan vega að tökum loknum. **Umferð farartækja utan vega takmarkast við þau svæði þar sem tökur fara fram og skal aðeins vera á ofangreindum svæðum. Aðeins skal ekið á gróðursnauðum svæðum og klettum á fyrrgreindum svæðum.**
- **Óheimilt er að keyra yfir gróin svæði. Þar sem þess gerist þörf við Smyrlabjörg skal þess gætt að ekki sjáist ummerki um aksturinn til dæmis með því að keyra eftir plönkum eða mottum sem hlífa undirlaginu.**
- Starfsmenn við tökurnar gangi snyrtilega um svæðið og forðist allt rask.

- Allur akstur utan vega og merktra slóða er óheimill. Á þetta einnig við um slóða sem eru aflagðir og búið að loka. Óheimilt er að leggja bílum utan vega, nema skv. 1. mgr. 31. gr. laga um náttúruvernd, bílbreidd frá veginum ef að ekki veldur náttúruspjöllum eða slysahættu.
- Koma skal fyrir merkingum á tökustað um að leyfi fyrir framkvæmdinni hafi fengist hjá Umhverfisstofnun.
- Starfsmenn við tökur skulu sjá til þess að vegslóðar sem myndast við akstur utan vega verði ekki villandi fyrir aðra gesti svæðisins og sjá til þess að óviðkomandi aðilar aki ekki þá vegslóða.
- Gæta skal að mengunarvörnum bifreiða og þess gætt að mengandi vökkvar berist ekki í jarðveg.
- Afmá skal öll ummerki um tökurnar og aksturinn á svæðinu þegar þeim er lokið.
- Ganga skal snyrtilega um svæðið og þess gætt að allt rusl verði fjarlægt.
- Óheimilt er að raska gróðri og jarðminjum.
- Óheimilt er að trufla dýralíf.
- Kynna skal fyrir starfsfólki þau skilyrði sem fylgja leyfinu áður en undirbúningur og tökur hefjast.
- Ef upp koma álitamál um framkvæmdir sem tengjast tökunum og frágang svæðisins skal hafa samband við Umhverfisstofnun.

Ábendingar

Umhverfisstofnun bendir á að samþykki landeigenda þarf fyrir tökunum. Sækja þarf um leyfi til sveitarfélags og landeigenda. Eins þarf umsækjandi að sækja um leyfi til Vegagerðarinnar fyrir tökunum.

Gjald


Umhverfisstofnun innheimtir gjald vegna vinnslu og afgreiðslu umsóknar um leyfi til aksturs utan vega í tengslum við kvíkmyndagerð. Gjaldið er 39.400 kr. sbr. 24. gr. a. í gjaldskrá Umhverfisstofnunar, nr. 535/2015.

Eftirlit


Umhverfisstofnun mun fara með eftirlit með framkvæmdinni og frágangi. Innheimt verður fyrir eftirlitið samkvæmt gjaldskrá stofnunarinnar, nr. 535/2015, 13.200 kr/klst.

Umhverfisstofnun bendir á að skv. 1. mgr. 91. gr. laga nr. 60/2013 um náttúruvernd, sbr. 26. gr. stjórnsýslulaga nr. 37/1993 er heimilt að kæra ákvörðun þessa til umhverfis- og auðlindaráðherra sbr. og VII. kafla laganna. Aðsetur ráðuneytisins er að Skuggasundi 1, 150 Reykjavík.

Virðingarfyllst



Gunnlaug Einarsdóttir
Sviðstjóri



Þórdís Vilhelmína Bragadóttir
Sérfræðingur

